

Olivia Figaroa di OLA encuanto awa sushi:

ENVEZ DI FUENTE DI BIDA A PARA BIRA FUENTE DI DISGUSTO

ORANJESTAD (AAN): E problema di awa ta mas serio cu hopi hende ta pensa.

E miembro di Organizacion Liberal Arubiano, Olivia Figaroa, a tuma nota di reclamo di habitantenan di Distrito di Noord cu ta hayando awa sushi saliendo for di tubo. El a bay bishita e cas y casi no por kere su wowo di loke el a mira kico ta sali for di e tubo.

E preocupacion di pueblo ta mas bien riba e parti di salud di habitantenan, y peor ainda cu nan ta ser humilia

door di un servicio cu no ta cuadra pa loke bo ta paga pe.

Bo ta paga pa algo cu bo tin derecho di haya. Con hopi mas mester soporta e situacion aki, y mester bisa cu esaki no ta mehorando, pero e ta empeorando.

E muestra di awa cu DIARIO a mira ayeratardi for di un habitante di Noord ta di un color di fruit-punch. Mester corda cu no ta hopi hende por cumpra botter di awa mineral, y tampoco un filter.

Ayera mes DIARIO a trece



dilanti un foto di un habitante di Playa cu a haya awa color blauw cu ta sali for di tubo, y awor habitante di Noord ta haya awa color oranje.

Den un entrevista cu DIARIO a sostene cu Olivia Figaroa, esaki a indica cu e ta preocupa pa e mamanan cu tin baby of mucha chiquito y cu mester traha lechi of papa pa nan alimentacion.

"Si nos kier un comunidad sano, awa ta un di e necesidadnan di mas grandi cu tin y net esaki mester ta optimal, como cu e muchanan ey ta e

futuro pa e isla aki," el a bisa. "Mi ta kere cu Gobierno mester siquiera duna un spliacion kico ta pasando pa asina pueblo worde poni na altura kico ta pasa y no mantene secreto. Mester sa con hopi e ta tarda, y kico ta wantando e solucion pa e problema aki. Bo ta paga pe, pues bo mester tin derecho di haya informacion pakico e ta pasando."

Famianan na Ponton ta luchando algun dia caba cu hemchi y tobo di awa, como cu tin biaha pa henter dia e

presion di awa no ta suficiente. Esaki tambe segun OLA ta algo cu ta di lamenta den e epoca moderno aki cu mundo ta aden.

Ta ser bisa cu tin un surplus riba presupuesto, pues pakico no por paga overtime pa asina caba for once and for all cu tur e problemanan cu tin encuanto suministro di awa, ta loke Olivia Figaroa a declara na DIARIO.